

01 Nov. 2025

- प्रधानमंत्री नरेन्द्र मोदी होरें नमें छत्तीसगढ़ विधान सभा भवन दा उदघाटन कीता। अटल बिहारी वाजपेई हुंदी प्रतिमा दा परदा बी गुआड़ेया।
- राष्ट्रपति द्रौपदी मुर्मू ते प्रधानमंत्री नरेन्द्र मोदी होरें स्थापना दिवस पर केई राज्यें ते केन्द्र शासित प्रदेशें गी शुभकामनां दितियां।
- आंध्र-प्रदेश च श्री काकुलम जिले दे काशीबुग्गा स्थित श्री Venkateshwar स्वामी मंदिरै च अज्ज भगदड़ मचने करी 9 लोकें दी मौत होई गई।
- रक्षामंत्री राजनाथ सिंह होरें आखेया जे भारत –आसियान ते औदे नै जुड़े दे होरनें देशें कन्नै अपने रक्षा सहयोग गी क्षेत्रीय शांति- स्थिरता ते क्षमता निर्माण च योगदान दे रुपै च दिखदा ऐ।
- लखनऊ गी UNESCO Creative City of Gastronomy दे रुपै च नामित किता गया ऐ- जेड़ा एदी विशिष्ट पाक विरासत ते भारत दी समृद्ध Gastronomic परम्पराएं च अनमुल्ला योगदान गी मानता दिंदा ऐ।
- भारत नै मनामा च रिकार्ड 48 तमगे कन्नै 2025 एशियाई युवा खेडुं च हुने तोड़ी दा सर्वश्रेष्ठ प्रदर्शन किता।

<><><><><><>

PM Chhattisgarh

प्रधानमंत्री नरेन्द्र मोदी होरें अज्ज छत्तीसगढ़ दे नवा रायपुर च राज्य विधानसभा दे नमें भवन दा उदघाटन कीता। इस मौके पर श्री मोदी होरें साबका प्रधानमंत्री ते भारत रतन अटल बिहारी वाजपेयी हुंदी प्रतिमा दा परदा गोआड़ेया। इस मौके पर प्रधानमंत्री होरें आखेया जे अज्ज पूरा देश अपनी विरासत गी संजोइयै विकास दी बत्तै पर अगड़ा बदा'रदा ऐ। उ'नें आखेया जे इयै भावना केन्द्र सरकार दे हर फैसले ते नीति च झलकदी ऐ। प्रधानमंत्री होरें आखेया जे भारत दा एह लक्ष्य छत्तीसगढ़ विधानसभा दे नमें भवन च स्पष्ट रुपै नै दिखेया जाई सकदा ऐ- जेड़ा राज्य दी समृद्ध सांस्कृतिक विरासत गी दर्शादा ऐ। श्री मोदी होरें आखेया जे नमां विधानसभा भवन लोकतंत्र दे इक स्तंभ दे रुपै च खड़ा ऐ ते इत्थै लैते गेदे फैसले आने आहले दाहके तोड़ी छत्तीसगढ़ दे भाग्य दा मार्ग-दर्शन करगंन। एदे कोला पैहले प्रधानमंत्री होरें नवा रायपुर स्थित श्री सत्य-साई-संजीवनी अस्पताल दा दौरा कीता- जित्थे उनें दिल की बात कारजक्रम तैहत कोई ढाई हजार बच्चें कन्नै गल्लबात कीती। जन्मजात हृद्य रोगें कन्नै पीड़ित इनें बच्चें दा अस्पताल च निशुल्क ते सफल उपचार होआ। इस मौके पर प्रधानमंत्री होरें बच्चें गी जीवनदान प्रमाण-पत्र प्रदान कीते। दौरे दौरान श्री मोदी होर शहीद वीर नारायण सिंह मैमोरियल ते नवा रायपुर च आदिवासी सुतंत्रता सेनानी संग्रहालय दा उदघाटन ते दौरा बी करगंन।

<><><><><><>

राष्ट्रपति द्रौपदी मुरमू ते प्रधानमंत्री नरेन्द्र मोदी होरें अज्ज आंध्र-प्रदेश- छत्तीसगढ़- हरियाणा- कर्नाटक- केरल- लक्षद्वीप- मध्य-प्रदेश- पंजाब ते पुडुचेरी दे स्थापना दिवस पर उत्थू दे लोकें गी शुभकामनां दितियां ना। इक सोशल मीडिया पोस्ट च राष्ट्रपति मुरमू होरें आखेया जे इनें सब्भै राज्यें नै देश दी प्रगति च उल्लेखनीय योगदान दिता ऐ। उनें इनें राज्यें ते केन्द्र शासित प्रदेशें दी विकास यात्रा च निरंतर नमें कीर्तिमान स्थापित करने दी कामना कीती। राष्ट्रपति होरें इनें राज्यें दे सब्भै निवासियें दी निरंतर समृद्धि ते कल्याण लेई बी अपनी शुभकामनां दितियां। प्रधानमंत्री नरेन्द्र मोदी होरें छत्तीसगढ़- हरियाणा- कर्नाटक- केरल ते मध्य-प्रदेश गी स्थापना दिवस दी शुभकामनां दितियां। इक सोशल मीडिया पोस्ट च श्री मोदी होरें छत्तीसगढ़ दे लोकें गी बधाई दिंदे होई आखेया जे राज्य प्रगति दे नमें मानक तय करा रदा ऐ।

<><><><><><>

PM Guinness

प्रधानमंत्री नरेन्द्र मोदी होरें अज्ज आखेया जे स्वस्थ नारी- सशक्त परोआर अभियान आसेया बनाए गे ते Guinness World Record सराहनीय ना। इक सोशल मीडिया पोस्ट च श्री मोदी होरें आखेया जे इस चाली दे जन-आंदोलन महिला सशक्तीकरण दे प्रयासें गी गति दिंदे न ते देश दी नारी शक्ति दे जीवन पर परिवर्तनकारी प्रभाव पौंदा ऐ। स्वस्थ नारी- सशक्त परोआर अभियान नै केई रिकार्ड बनाए न- जिंदे च इक महीने च स्वास्थ्य सेवा प्लेटफार्म पर सब्भनें शा मता करोड़ लोकें दा पंजीकरण शामिल ऐ।

<><><><><><>

AP- Stampede

आंध्र-प्रदेश दे श्रीकाकुलम जिले च काशीबुग्गा च श्री Venkateswera स्वामी मंदिर च अज्ज भगदड़ च 9 लोकें दी मौत होई गई। अज्ज एकादशी दे ध्याड़े दर्शन लेई शरदालुएं दी भारी भीड़ ही। खबरें दे मताबक इक Railing डिगने करी लोकें बिच भगदड़ मची गई। मृतकें दे बारे च दस्सेया जा रदा ऐ जे ओ पलासा ते काशीबुग्गा दे आहले-दुआले दे इलाकें दे रौहने आहले हे। राष्ट्रपति द्रौपदी मुरमू-उपराष्ट्रपति सी.पी. राधाकृष्णन- प्रधानमंत्री नरेन्द्र मोदी ते आंध्र-प्रदेश दे मुखमंत्री एन. चन्द्रबाबू नायडू होरें इस त्रासदी पर गैहरा दुख व्यक्त किता ते इसी बेहत दुखद दस्सेया।

<><><><><><>

Rajnath - ASEAN Meeting

रक्षामंत्री राजनाथ सिंह होरें आखेया जे भारत- आसियान ते संवाद सांझेदार देशें कन्नै अपने रक्षा सहयोग गी क्षेत्रीय शांति- स्थिरता ते क्षमता निर्माण च योगदान मनदा ऐ। मलेशिया दे कुआलालपुर च आसियान ते संवाद सांझेदार देशें दे रक्षा मंत्रियें दी बैठक गी सम्बोधित करदे होई

उनें आखेया जे एहू संगठन भारत दी Act East नीति ते व्यापक हिंद- प्रशांत दृष्टिकोण दा अभिन्न हिस्सा ऐ। रक्षामंत्री होरें आखेया जे हिंद प्रशात सुरक्षा गी लेइयै भारत दा दृष्टिकोण आर्थिक विकास, प्रोद्योगिकी सांझेदारी ते मानव संसाधन विकास च सहयोग बदान्दा ऐ। उनें आखेया जे सुरक्षा ते सतत विकास दे बशकार मजबूत सम्पर्क भारत ते आसियान देशें दे बशकार सञ्ची सांझेदारी दा प्रतीक ऐ। उनें आखेया जे मुक्त- समावेशी ते नियम आधारित हिंद-प्रशांत क्षेत्र दा भारत दा दृष्टिकोण महेशा स्पष्ट रेहा ऐ।

<><><><><><>

WAVES

सूचना ते प्रसारण सचिव संजू जाजू होरें अज्ज हैदराबाद च चला रदे India Joy 2025 च WAVES बजार दा उदघाटन कीता। इस मौके पर उनें आखेया जे WAVES बजार थमां भारत दे पूरे मीडिया ते मनोरंजन उद्योग गी लाह थोने दी मेद ऐ। उनें इसी Craft to Commerce दसेया ते बेचने ते खरीदने आहलें गी इक मंच पर आनने दे बारे बी दस्सेया। उनें भरोसा जताया जे OTT दे खरीददार बी WAVES बजार प्लेटफार्म पर आगंन ते सब्भै भाषाएं लेई बजार उपलब्ध होगे। WAVES बजार च 30 खरीददार ते 500 करोड़ रुपे दी परियोजना शामिल कीतियां गेइयां ना।

<><><><><><>

GST Collection –October

GST दरें च 22 सितम्बर थमां लागू कटौती दे बाद इस बरे अक्तूबर दे कुल सकल वस्तु ते सेवा कर GST संग्रह च अक्तूबर 2024 दी तुलना च 4.6 फीसद वृद्धि दर्ज होई। अक्तूबर 2024 च GST थमां कुल राजस्व संग्रह इक लक्ख 87 हजार करोड़ रुपे हा। एह हून बदीयै इक लक्ख 95 हजार करोड़ रुपे शा मता होई गया। अक्तूबर च केन्द्रीय GST संग्रह 36 हजार 5 सौ 47 करोड़ रुपे ते राज्य GST 45 हजार 134 करोड़ रुपे रेहा।

<><><><><><>

CG- Defence Accounts

विश्वजीत सहाय होरें अज्ज रक्षा लेखा महानियंत्रक दा पदभार ग्रहण किता- ओ भारतीय रक्षा लेखा सेवा दे 1990 बैच दे अधिकारी ऐन। रक्षा मंत्रालय नै दस्सेया जे श्री सहाय होरें ब्रिटेन च कैम्ब्रिज विश्वविद्यालय ते जर्मनी च George C. Marshall यूरोपीय सुरक्षा अध्ययन केन्द्र सनें केई अंतराष्ट्रीय प्रशिक्षण मंचें पर भारत दा प्रतिनिधित्व किता ऐ। उनें रक्षा लेखा विभाग च केई महत्वपूर्ण पदें पर कम्म कीता ऐ। श्री सहाय होरें सरकार च विज्ञान ते प्रोद्योगिकी विभाग च अतिरिक्त सचिव ते वित्तीय सलाहकार ते रक्षा मंत्रालय च खरीद शाखा दे वित प्रबंधक जनेई केई प्रमुख पदें पर कम्म कीता ऐ।

<><><><><><>

लखनऊ गी UNESCO मौलिक पाक-कला शैहर दा दर्जा दिता गया ऐ। एह दर्जा लखनऊ दी विशिष्ट पाक कला विरासत ते भारत दी समृद्ध पाक कला परम्पराएं च एदे अनमुल्ले योगदान दे सम्मान च दिता गया ऐ। केन्द्रीय संस्कृति ते पर्यटन मंत्री गजेन्द्र सिंह शेखावत होरें इक सोशल मीडिया पोस्ट च आखेया जे एह सम्मान लखनऊ दी वैश्विक पंछान बदांदा ऐ। उ'नें आखेया जे लखनऊ भोजन ते पाककला संस्कृति दे प्रमुख गंतव्य दे रूपै च स्थापित होगा। UNESCO Creative Cities नैटवर्क राएं सैलसफा गी बढावा देना- संस्कृति आधारित आर्थिक विकास- विरासत संरक्षण ते अंतराष्ट्रीय संरक्षण ते अंतराष्ट्रीय सहयोग दे नमें रस्ते खोलदा ऐ। केन्द्रीय मंत्री होरें आखेया जे प्रधानमंत्री नरेन्द्र मोदी हुंदे दूरदर्शी नेतृत्व च भारत दी शाशक्त परम्परा संस्कृति ते मूल्य वैश्विक मंच पर अभूतपूर्व मानता ते सम्मान हासल करा रदा ऐ।

<><><><><><>

KWFF

5मां कश्मीर विश्व फिल्म उत्सव अज्ज श्रीनगर दे टैगोर हाल च शुरू होआ। 7 नवम्बर तोड़ी चलने आले इस फिल्म उत्सव च भारतीय ते बाहरले मुल्लें दियां कोई 60 कोला मतियां फिलमां दस्सियां जागंन जिंदे च बक्ख-बक्ख भाषाएं ते संस्कृतियें दी झलक दिक्खने गी लब्बोग। फिल्म उत्सव दे आयोजकें दा आखना ऐ जे इनें फिल्में च- फीचर फिल्मां- दस्तावेजी फिल्मां ते ऐनिमेशन फिल्मां बी शामिल ना। उंदा मनना ऐ जे इस फिल्म उत्सव दे राएं नां छड़ा फिल्म निर्माण गी बढावा थहोग ते काबिल नौजवानें दा फिल्में बक्खी आकर्षण बदोग- सगुआं एदे राएं सैलसफा गी बढावा थहोग- कश्मीर दी खूबसूरती होर मती उजागर होग ते कम्म-रोजगार ते मते-मते मौकें बी पैदा होगंन। 7एं दिनें दे इस आयोजन दौरान केई मशहूर फिल्मी हस्तियें दे शामिल होने दी मेद ऐ- जिंदे च रज़ामुराद- रजत कपूर-जयति भाटिया- शिशिर शर्मा- मधुर भंडारकर- ललित पारिमू ते सुनित टंडन शामिल ना।

<><><><><><>

Youth Games

भारत नै बेहरीन दे मनामा च आयोजित 2025 एशियाई युवा खेडुं च अपना सर्वश्रेष्ठ प्रदर्शन किता- जिस च उ'नें 13 सुन्ने- 18 चांदी ते 17 कैह सनें 48 तगमें जिते- जेडे 2009 ते 2013 दे पिच्छले तगमे शां मते ना। 222 भारतीय एथलीटें दे बिच उल्लेखनीय क्षणें च कुडियें दी कबड्डी टीम आसेया भारत दा पैहला सुन्ने दा तगमा जितना- प्रिति समिता Bhoi आसेया भारोतोलन च विश्व युवा रिकार्ड स्थापित करना ते अखीरी दिन मुक्केबाजी ते बीच कुश्ती च 7 सुन्ने दे तगमे कन्नै इक मजबूत अंत शामिल ऐ। भारत गी पैहला तगमा खुशी होरें दोआया- जिनें कुडियें दी कुराश मकाबले च कैह दा तगमा जितियै- जिसले जे रंजना यादव होरें 5 हजार पैदल चाल च चांदी दे तमगे कन्नै एथलेटिक्स च पैहला तगमा जितेया। कुडियें दी कबड्डी टीम नै ईरान गी हराइयै भारत गी पैहला

सुन्ने दा तगमा दुआया ते प्रिति समिता Bhoi नै कुडियें दे 44 किलोग्राम क्लीन एंड Jerk च विश्व युवा रिकार्ड स्थापित करियै देश दा पैहला व्यक्तीगत सुन्ने दा तगमा जितेया ऐ।

<><><><><><>

Women Cricket Final

ICC महिला One Day Cricket विश्व कप च भारत कल नवी मुम्बई स्थित डाक्टर D.Y. Patil Sports अकादमी च दखन अफ्रीका कन्नै खेडोगा। मैच दपैहरी 3 बजे शुरु होगा। दखन अफ्रीका नै गुवाहटी च पैहले सैमीफाईनल च इंग्लैंड गी 125 रन्ज कन्नै हराइयै फाईनल च प्रवेश किता हा। भारत नै वीरवार गी नमीं मुम्बई च इक रोमांचक सैमीफाईनल च आस्ट्रेलिया गी 5 विकटें कन्नै हराइयै फाईनल च प्रवेश किता।

<><><><><><>